

La'ó Hamutuk

Institutu Timor-Leste ba Monitoriza no Analiza Dezenvolvimentu
Rua. D. Alberto Ricardo, Bebora, Dili, Timor-Leste
Tel: +670 3321040 no +670 77234330, email: laohamutuk@gmail.com
Website: www.laohamutuk.org



Dili, 6 Julu 2020

Bodik ba : Sua Exelénsia Koordenadór ba Komisaun Rekoperasaun Ekonómiku,
Dr. Rui Gomes ho Ekipa

Asuntu : Sujestaun no rekomendasaun husi La'ó Hamutuk

La'ó Hamutuk dékada rua ona, ajuda Timor-Leste nian prosesu dezenvolvimentu, liu halo monitor, analiza no advokasia bazeia ba evidénsia no realidade loloos povu nian, ajuda mós públiku atu komprende no partisipa prosesu polítiku ne'ebé la'ó iha Timor-Leste. Ami insiste tinan barak atu Timor-Leste la'ó iha diresaun ekonómiku ida ne'ebé forte no sustentável, diresaun ekonómiku ida ne'ebé ativamente involve populasaun no utiliza rekursu uitoan ne'ebé iha ho loloos ba ema ne'ebé presiza tebes.

Ba dala uluk, hato'ó obrigadu barak ba simu ami husi Sosiedade sivil hodi ko'alia ho Dr. Rui Gomes ho nian ekipa servisu ba rekuperasaun ekonómiku. Liu husi karta ida ne'e, reforsa liu tan buat hotu ne'ebé ami hato'ó ona durante enkontru liu ba. Dala ida tan ami hakarak subliña liu tan katak, rekursu petróleu sei la sustenta nasaun nian ekonomia ho seguru no lori Timor-Leste ba tempu naruk, fenómenu mundiál atuál ho senáriu makro ekonomia Internasionál ne'ebé laiha serteza, Povu nian moris tenke organiza no harii ho realidade atuál ne'ebé loos. Nune'e, ami sujere atu kansela projetu petrolíferu sira inklui Greater Sunrise no Tasi mane. Konsentra rekursu umanu, finanseiru, tempu no enerjia tomak ba organiza setór produtivu no povu nian moris.

Maske maioria tuir relatóriu sensu agrikultura 66% husi populasaun moris nudár agrikultór no prodús ai-han ba Timor oan tomak, política sira sei konsidera agrikultura nudár profisaun ne'ebé valor ki'ik liu kompara ho profisaun seluk. Ba oin, presiza valoriza, enkoraja, no apoiu misaun importante ne'ebé agrikultór sira asume.

Too agora, Timor-Leste seidauk iha esforsu apropriadu ba hadi'ak situasaun pobreza endemiku, malnutrisaun no hadi'ak sanitasaun iha rai laran. Esforsu barak mai ho modelu projetu no modelu emerjénsia ne'ebé la oferese solusaun tempu naruk ba problema sira ne'e. Nudár solusaun ba tempu naruk presiza iha esforsu sériu no konsistente hodi investe ba setór produtivu sira, liu-liu setór agrikultura ne'ebé mak xave ba rezolve problema insufisiensia ai han no malnutrisaun.

Iha setór **agrikultura**, bele hahú reorganiza no aloka fali extensionista ba kada suku ka aldeia hodi akompaña no organiza agrikultór sira hodi halo produsaun tuir dalan ne'ebé mak sustentável liu. Estensionista sira mós tenke hetan Kapasitasaun di'ak kona-ba valores nutrisaun iha ai han diferente nune'e bele ajuda agrikultór hatene kona-ba ba valor nutrisaun husi produktu ne'ebé sira rasik prodús hela. Dalan ida ne'e bele ajuda família sira redús problema inseguransa ai han no malnutrisaun iha sira nia leet.

Iha prosesu ne'e, presiza reorienta mós ajénsia internasionál sira ne'ebé servisu iha setór agrikultura atu implementa programa ne'ebé la halo agrikultór sira depende ba fundu husi ajénsia sira ne'e ka husi governu, no la abandona misaun prinsipál nudár produtór. Presiza mós

hamosu kolaborasaun ho universidade sira hodi koloka estudante sira ba hela ho grupu agrikultór sira hodi fahe sira nia koñesimentu sientífiku kona-ba produsaun agrikultura ba agrikultór sira no mós aprende husi agrikultór sira nia matenek kona-ba agrikultura. Ami sujere presiza organiza mós peritu ne'ebé progresivu no ajuda kondisaun sira ba agrikultór sira hodi ajuda organiza no mobiliza agrikultór sira, servisu kada loron ho sira, hodi asegura produsaun sustentável. Ami mós sujere atu Timor-Leste hahú elabora indústría transformadóra iha setór oin oin bazeia ba realidade no sustentável, hahú elabora dalan ba prosesamentu ai han sira, hodi fornese ba povu no fornese ba demanda ka nesiedade merkadu lokál nian.


Ami sujere mós atu Governu bele investe maka'as ba **bee no saneamentu** hodi ajuda hadi'ak ema nian moris, bee ba agrikultura no ba balada sira. Investimentu sira iha bee ho maneira sustentável, evita pratika sira ne'ebé hasai de'it bee barak husi rai laran la ho hanoin oinsá bele preserva, konserva bee no konsume bee ho sustentável liu. Ami mós sujere atu estadu bele organiza rekursu hotu disponivel hodi asegura bee nudár diretu fundamental ema nian, ami la aseita solusaun ba bee ne'ebé liu husi dalan privatizasaun no komersializasaun ne'ebé sei kria beibeik problema bee iha futuru hanesan hatudu ona iha Nasaun barak.

Ami mós sujere atu organiza rekursu disponivel ba harii sistema **edukasaun** ida ne'ebé apropriadu, relevante no sustentável. Presiza hametin liu tan kurríkulu ne'ebé iha, ne'ebé haforsa estudante sira nia kapasidade iha lian rua ofisiál sira. Nesesita kontinua fó formasaun ba manorin sira, prepara manorin foun sira, hadi'ak infrastrutura báziku eskola sira nian inklui bee no saneamentu iha eskola sira, harii biblioteca no laboratóriu sira hodi lori estudante sira ba ajusta an iha avansu maka'as siénsia no teknolojia, manorin no estudante sira nian prosesu aprendizajen sira orienta ba realidade sosiál sosiedade nian no adapta siénsia no teknolojia ne'ebé apropriadu ba Nasaun nian realidade agora no iha futuru.

Ami mós sujere atu organiza rekursu disponivel hodi investe ba **saúde**, organiza didi'ak médiku sira ne'ebé ita iha, uza lideransa competente no loloos hodi iha kapasidade ba maneja/jestaun rekursu umanus no organizasaun servisu tomak atendimentu iha ospital sira, ai-moruk sira, organiza fasilidade sira, nune'e bele salva Timor oan sira ne'ebé tuituir loloos bele prevene husi risku mate nian. Sosa fasilidade sira deteta moras nian, operasaun nian no kurativu nian hodi halo tratamentu iha rai laran duke gasta osan boot ba rai li'ur ne'ebé loloos ita bele organiza iha rai laran.

Ami mós sujere atu haforsa direasaun saúde nian ne'ebé servisu ba prevensaun nian hodi kolabora ho edukasaun, bee no saneamentu no agrikultura hodi promove kampaña no edukasaun ba sidadaun sira kona-ba oinsá han ai-han lokál no orgániku ho nutrisaun aas liu no oinsá prevene moras uza konsume ai han di'ak no bee seguru.

Espera katak Governu bele adopta rekomendasaun sira ne'ebé ita hotu hanoin di'ak ba povu Timor-Leste ho hasai lalais povu husi difikuldade oin oin ne'ebé satan netik esforsu ba eradika kiak no mukit. Mak ne'e de'it, kontribuisaun husi La'ó Hamutuk ba esforsu ida ne'ebé ita-boot lidera, ami nian parte kontinua disponivel ba diskusaun no kolaborasaun.



Marta da Silva no Adilsonio da Costa Junior
Ekipa Koordensaun